

DISSIPELSKAP

LES 26

1	GEBED
---	-------

Bid vir die leiding van God se Gees, vir bewuswording van sy teenwoordigheid en vir die luister na sy stem. Wy hierdie les oor dissipelmaking aan die Here toe.

2	DEEL (20 minute) <i>[STILTETYE]</i> GENESIS 6:1 – 9:28
---	-----------------------------------------------------------

Maak beurte en vertel/deel (of lees) kortliks wat jy in een van jou stiltetye uit die voorgeskrewe Bybelgedeelte geleer het (Genesis 6:1 – 9:28). Luister na die persoon wat deel, neem hom ernstig op en aanvaar hom. Moenie verder ingaan op dit wat hy sê nie.

3	MEMORISERING (20 minute) <i>[DIE EVANGELIE]</i> DIE AARD VAN DIE SONDE. ROMEINE 3:23
---	-----------------------------------------------------------------------------------------

Die derde reeks memoriseringsverse (C) word "Die evangelie" genoem. Die vyf temas is: Die aard van die sonde, die straf vir die sonde, die versoening van sonde, verlossing is 'n gawe en verlossing deur geloof.

A. MEDITASIE (oor 'n Bybelgedeelte)

Romeine 3:21-23. "Maar nou het die vryspraak deur God waarvan die wet en die profete getuig, in werking getree. Dit is die vryspraak wat nie verkry word deur die wet te onderhou nie, maar deur in Jesus Christus te glo. God gee dit sonder onderskeid aan almal wat glo. Almal het gesondig, en het nie deel aan die heerlijkheid van God nie."

Skryf die memoriseringsverses as volg op die bord. Skryf die teksverwysing ook aan die onderkant en agterkant van jou memoriseringskaartjie.

(1)

Die aard van die sonde Romeine 3:23
Almal het gesondig en het nie deel aan die heerlijkheid van God nie.
Romeine 3:23

Romeine 3:23

NLV. "Ons het immers almal gesondig. Ons almal het God beroof van die eer wat Hom toekom."

1. Die betekenis van die woord "sonde" in die Bybel.

Die woord verwys na ons verhouding met die God van die Bybel. "Sonde" beteken om God se doel vir jou lewe te mis. God se doel vir mense is dat hulle 'n korrekte verhouding met die God van die Bybel het en ook dat hulle die dinge sal doen wat reg is in God se oë. Maar omdat mense nie die regte verhouding tot God, tot hulle naaste en tot hulleself het nie en ook nie doen wat reg is in God se oë nie, word hulle in die Bybel "sondaars" genoem. Die woord "sonde" beteken ook "skiet tekort aan God se standaard van volmaaktheid" vir alle mense, naamlik Jesus Christus.

Wat die mense ookal in die wêreld beskou as "goed" (goeie werke, goeie geloofsoortuigings, goeie gedrag, ens.) word gemeet aan God se volmaakte standaard vir die menslike lewe. God se standaard is bekendgemaak in Jesus Christus en toe opgeteken in die Bybel. Gods standaard is absolute volmaaktheid. "As iemand die hele wet onderhou, maar in een opsig struikel, is hy skuldig ten opsigte van al die gebooe" (Jakobus 2:10). Dit is duidelik dat niemand goed genoeg is nie! Die godsdienstigheid en goeie werke van alle mense skiet ver te kort. "Almal het gesondig en het nie deel aan die heerlijkheid van God nie" (Romeinen 3:23). Selfs die mense wat heel voorbeeldige lewens lei, is tog "sondaars" in God se oë! Alle mense in die menslike geskiedenis (behalwe Jesus Christus) mis God se doel en skiet tekort aan God se standaard.

Die woord "sonde" beteken enersyds "doen wat verkeerd is in God se oë" en andersyds "nie doen wat reg is in God se oë nie". Sonde is:

- nie alleen 'n verkeerde verhouding met die God van die Bybel nie
- maar ook geen verhouding met die God van die Bybel!

2. Die wortel van die sonde en die vrugte van die sonde.

Mense wat graag verklaar, “Ek steel nie, ek lieg nie, ek pleeg nie moord of ‘n ander misdaad nie”, is tog sondaars, omdat hulle net kyk na die vrugte van die sonde en nie na die wortel van die sonde nie.

(1) Die wortel van die sonde.

Die wortel van die sonde is selfgenoegsaamheid of onafhanklikheid van God. Dit beskryf die gebroke verhouding met God. Selfs al sou mense nie steel, lieg, doodslaan of ‘n ander misdaad begaan nie, is hulle tog nog sondaars, omdat hulle geen verhouding met die Lewende God het wat Hom in die Bybel geopenbaar het nie. Selfs al leef hulle voorbeeldige lewens, bly hulle “sondaars” omdat hulle hul lewens los of onafhanklik van die God van die Bybel leef. Selfs al is hulle heel godsdienstig, is hulle nog “sondaars” omdat hulle leef in ooreenstemming met hulle eie godsdienstige idees en gewoontes.

Die wortel van die sonde is om God se doel vir jou lewe te mis en jou eie godsdienstige en morele doelwitte en standaarde los van God op te stel. Die wortel van die sonde is om doelbewus die grense van God se geboorte te oortree of selfs alle grense te minag. Die wortel van die sonde is om jou eie wêreldbeskouing, kultuur en lewenswyse te ontwikkel los van die God van die Bybel.

(2) Die vrugte van die sonde.

Die vrugte van die sonde is om te doen wat God verbied en na te laat wat God gebied. Die vrug van die sonde groei uit die wortel van die sonde. Die vrugte van die sonde maak die wortel van die sonde voor die hand liggend, sigbaar en onweerlegbaar. Die vrugte van die sonde bestaan uit alle vorme van kwaad doen, en alle vorme van die goeie na te laat. Lyste van sondes wat God verbied het, kan mens kry in Markus 7:20-23, Romeine 1:28-32, Galasiërs 5:19-21, Titus 3:3 en Openbaring 21:8. “Sonde” beskryf dus die doen van verkeerde dinge en die nalaat van goeie dinge. Dit beskryf:

- ‘n gebroke verhouding met die God van die Bybel hê
- of geen verhouding hê met die God van die Bybel nie.

Wanneer Christene die evangelie verkondig, moet hulle mense help om die wortel en die vrugte van die sonde te begryp.

3. Die heerlijkheid van God (AOV).

“Die heerlijkheid van God” is die samevattende beskrywing van die wyse waarop God sy goddelike natuur en teenwoordigheid uitdruk. God het die eerste mense na sy beeld geskep (Genesis 1:27), d.w.s. hulle het kenmerke van God besit, byvoorbeeld sy lewe, heiligheid en liefde. Nadat hulle in sonde geval het, het hulle nie meer hierdie kenmerke besit nie. In plaas daarvan was hulle geestelik dood en liggaamlik sterflik (Genesis 3:19), hulle het onheilig en onregverdig geword (Genesis 6:5), liefdeloos (Genesis 4:8-9) en vir God weggekrui (Genesis 3:8-10).

Dit is wat Romeine 3:23 wil uitdruk. Alle mense mis die doel waarvoor God hulle geskep het. Hulle het die beeld van God verloor. Hulle het nie meer hierdie noodsaaklike goddelike kenmerke om in God se teenwoordigheid as “regverdig” te kan staan nie. En hulle het ‘n besef van God se teenwoordigheid verloor. God se standaard vir mense om naby Hom te kom, regverdig te wees en deur Hom aanvaar te word is niks minder as 100% volmaaktheid nie! Na die sondeval is daar geen mens wat kwalifiseer om naby God te kom en deur Hom aanvaar te word nie. Die gevolg is dat alle mense God se goedkeuring verloor het, onwaardig is om lof van Hom te ontvang en in plaas daarvan sy veroordeling verdien.

Samevatting. Alle mense het hulle oorspronklike staat van onskuld en volmaaktheid verloor. Hulle besit nie meer God se heerlike kenmerke of goedkeuring nie.

B. MEMORISERING EN HERHALING/REPETISIE

1. Skryf.

Skryf die Bybelvers op ‘n kaartjie of op ‘n bladsy van ‘n notaboekie.

2. Leer. Memoriseer die Bybelvers op die korrekte manier. (1) Die aard van die sonde. Romeine 3:23

3. Repeteer.

Verdeel in groepies van twee en gaan mekaar se laaste gememoriseerde Bybelvers na.

4	BYBELSTUDIE (70 minute) <i>[GEMEENTE / KERK]</i> DIE KULTURELE TAAK VAN DIE GEMEENTE. GENESIS 1:24 – 2:25
---	---------------------------------------------------------------------------------------------------------------------

Gebruik die vyf stappe metode en doen saam Bybelstudie uit Genesis 1:24 – 2:25.

<u>STAP 1. LEES.</u> GOD SE WOORD Lees. Ons gaan Genesis 1:24 – 2:25 saam bestudeer. Laat elke lid van die groep ‘n beurt kry om één vers uit die Bybelgedeelte voor te lees.

STAP 2. ONTDEK.

WAARNEMINGS

Oorweeg. WATTER WAARHEID IN DIE GEDEELTE IS VIR MY BELANGRIK?

Of: WATTER WAARHEID IN DIE GEDEELTE RAAK MY VERSTAND OF MY HART/EMOSIES?

Skryf neer. Ontdek een of twee waarhede in die Bybelgedeelte wat jy begryp. Dink daaroor na en skryf jou gedagtes in jou Bybelstudie notaboek neer.

Deel. Nadat die groep ongeveer twee minute tyd gehad het om na te dink en neer te skryf, laat hulle in die rondte beurte maak om te vertel wat hulle ontdek het.

Die volgende is voorbeelde van ontdekkings. Waarskynlik sal die groeplede ander ontdekkings maak as wat hier deurgegee word.

1:27

Ontdekking 1. Die skepping van die mens na die beeld van God.

God het beide die man en die vrou na sy beeld geskep. Die besondere kenmerke van 'n man en van 'n vrou is nodig om "die beeld" of "persoonlikheid" van God tot uitdrukking te bring. Voëls, visse, diere en reptiele is heel anders geskep, want hulle is geen beelddraers van God nie. Die beeld van God in my maak dat ek soortgelyke kenmerke as God het, al is hierdie kenmerke nou heeltemal vertroebel. Hierdie waarheid help my om myself beter te begryp, om te erken hoe fantasties ek geskep is en om 'n gesonde selfbeeld te hê.

1:28

Ontdekking 2. Die seën van God.

Dit is die tweede keer dat God in die Bybel direk met die mens praat¹. God spreek 'n seën oor die skepping en diere uit, maar spreek sy seën direk gerig tot die man en die vrou. Dit is die eerste openbaring van God aan die mens! In hierdie openbaring gee God aan die mens sy taak en sy doel vir die lewe op aarde. Die take van die mens lig die geweldige verskil tussen mens en dier uit.

God het my geskep vir 'n besondere doel en taak. Ek is geskep om 'n besondere persoonlike verhouding met God te hê, 'n persoonlike verhouding tot ander mense te hê, en 'n persoonlike verantwoordelikheid teenoor God se skepping te hê. Met betrekking tot God moet die mens God se beeld met waardigheid dra. Met betrekking tot ander mense, moet die mens die verskil tussen die manlike en vroulike respekteer. En met betrekking tot die geskape wêreld, moet die mens die natuur onderwerp en oor die diere heers.

STAP 3. VRAAG.

UITLEG

Oorweeg. WATTER VRAAG UIT DIE BYBELGEDEELTE SOU JY AAN DIE GROEP WIL STEL?

Kom ons probeer so veel as moontlik van die waarhede in Genesis 1:24 – 2:25 te begryp en vrae te stel oor wat ons nie begryp nie.

Skryf neer. Formuleer jou vraag so duidelik moontlik deur gebruik te maak van vraagwoorde (wie? wat? waarom? hoe?) en skryf jou vraag in jou notaboek.

Deel. Nadat die groeplede ongeveer twee minute tyd gehad het om na te dink en hulle vraag neer te skryf, laat hulle in die kring beurte maak om hulle vraag te lees.

Bespreek. Bespreek so veel as moontlik van hierdie vrae met mekaar.

Die volgende is voorbeelde van vrae en aantekeninge wat die beantwoording vergemaklik.

6:1

Vraag 1. Wat is die verhouding tussen Genesis 1 en Genesis 2?

Aantekeninge. Genesis 2 is nie 'n tweede skeppingsverhaal wat sy oorsprong het uit 'n ander land en kultuur, soos sommige mense beweer. Genesis 2:4a leer duidelik dat "die menslike geskiedenis" pas begin na die voltooiing van die skepping van die heelal (Genesis 1:1 – 2:3).

(1) Genesis hoofstuk 1.

Genesis hoofdstuk 1 is nie "geskiedenis" in die moderne sin van die woord nie, omdat "tyd" eers op die vierde skeppingsdag geskep is (Genesis 1:14). Genesis 1 is "'n openbaring van God" aangaande die skepping van die heelal en veral van die aarde. Aangesien die mense die laaste was wat geskep is (Genesis 1:26-27), was hulle nie aanwesig toe God al die ander dinge geskep het nie. Later het God aan hulle geopenbaar:

- WIE alles geskep het (Genesis 1:1)
- VIR WIE God alles geskep het (Genesis 1:14,26,29)
- en VIR WATTER DOEL God alles geskep het (Genesis 1:28; vgl Jesaja 43:7; Kolossense 1:16).

(2) Genesis hoofstuk 2 en 3.

Genesis 2 is 'n uitgebreide openbaring van:

¹ Die eerste keer is Genesis 2:15

- die skepping van veral die man (Genesis 2:4b-7)
- die tuin van Eden (Genesis 2:8-17)
- en die skepping van die vrou (Genesis 2:18-25).

Genesis 3 beskryf die man en die vrou se val in sonde en dat God hulle uit die tuin van Eden verban het.

2:4b-17

Vraag 2. Wat is die chronologiese volgorde van die skepping van plante en die mens?

Aantekeninge. Terwyl Genesis hoofstuk 1 openbaar dat God eers die plante en bome geskep het en daarna die diere en die mens, lyk dit of Genesis hoofstuk 2 'n ander volgorde openbaar: eers die skepping van die man, toe die skepping van die plante en diere en ten slotte eers die skepping van die vrou. Tog is Genesis hoofstuk 1 en hoofstuk 2 nie teenstrydig nie, maar juis aanvullend.

(1) Genesis 2:4b-7. Die skepping van die man.

Genesis 2:4b-7 begin die beskrywing van die menslike geskiedenis: die skepping van die man wat die aarde moes bewerk. Die oorspronklike Hebreeus is saamgestel uit 'n hoofsin en twee bysinne tussenin (Genesis 2:4b en 7) . Die hoofsin is. “Toe die Here God die aarde en die hemel gemaak het,” - (bysin) - “Die Here God het toe die mens gevorm uit stof van die aarde en lewensasem in sy neus geblaas, sodat die mens 'n lewende wese geword het.”

Die letterlike vertaling van die hele paragraaf is as volg:

Die eerste deel van die hoofsin (Genesis 2:4b. “Toe die Here God die aarde en die hemel gemaak het” –

Die eerste bysin (Genesis 2:5). “was daar nog nie enige struik op die aarde nie en het daar ook nog nie enige groenigheid opgeskiet nie, want die Here God het dit nog nie op die aarde laat reën nie, en daar was nog nie 'n mens om die grond te bewerk nie.”

Die tweede bysin ('n sin in hakkies) (Genesis 2:6). “Daar het water uit die aarde uit opgekom en al die grond nat gemaak”

Die laaste deel van die hoofsin (Genesis 2:7) . - “Die Here God het toe die mens gevorm uit stof van die aarde en lewensasem in sy neus geblaas, sodat die mens 'n lewende wese geword het.”

Die uitleg van die hele paragraaf is as volg:

Die eerste deel van die hoofsin en die eerste bysin (Genesis 2:4b-5) . “Toe die Here God die aarde en die hemel gemaak het, was daar nog nie enige struik op die aarde nie en het daar ook nog nie enige groenigheid opgeskiet nie, want die Here God het dit nog nie op die aarde laat reën nie, en daar was nog nie 'n mens om die grond te bewerk nie”

Dit beskryf die aanvanklike situasie NA die skepping van die lig, die atmosfeer en die kontinente in Genesis 1:3-10. Daar was toe nog geen plante, gewasse of bome wat die mens kon bewerk nie, omdat daar nog geen reën was en nog geen mens om dit te bewerk nie.

Die tweede bysin ('n sin tussen hakkies) (Genesis 2:6) . “Daar het water uit die aarde uit opgekom en al die grond nat gemaak” Dit beskryf wat daar gebeur het toe God die plante en bome geskep het soos Genesis 1:11-13 dit stel. Toe het God 'n waterdamp (mis) uit die aarde laat opstyg wat die aardbodem bevochtig het en die reënwolke gevorm het. “Hy trek vog op uit die see, Hy haal reën uit die groot waters uit, dan giet die wolke water uit, laat hulle dit op al die baie mense val” (Job 36:27-28).

Die laaste deel van die hoofsin (Genesis 2:7). - “Die Here God het toe die mens gevorm uit stof van die aarde en lewensasem in sy neus geblaas, sodat die mens 'n lewende wese geword het.” Dit beskryf hoe God die mens (die man, Adam) geskep het. Hy het die mens geskep uit die elemente van die aarde en het die lewe in hom ingeblaas. Só het die mens “'n lewende wese geword”. Die skepping van die mens was uniek, want sy “liggaam” het bestaan uit de geskape elemente van die aarde, maar sy “gees” word direk deur God gegee en openbaar dat die mens die beeldraer van God geword het.

(2) Genesis 2:8-17. Die aanlê van die tuin van Eden.

In Genesis 2:8-17 word die beskrywing van die menslike geskiedenis voortgesit: God het 'n tuin geskep vir die mens om te bewerk. Die woord “paradys” beteken “tuin”. Eden was 'n tuin êrens in die ooste van waar die persoon hierdie openbaring opteken. Die ligging van die vier riviere tydens die aanleg van die tuin kan nie meer vasgestel word nie. Sedert die skepping was daar baie katastrofes soos aardbewings en vloede wat die geografiese ligging van plekke verander het.

Genesis 2:9 sê, “Die Here God het verder allerlei bome, mooi om na te kyk en lekker om van te eet, uit die grond laat uitspruit, ook die boom van die lewe in die middel van die tuin, en die boom van alle kennis”. Die vers verwys nie na die skepping van bome op die hele aarde nie (Genesis 1:9-11), maar verwys na die groei van bome later in die tuin van Eden. In die middel van die tuin was daar twee spesiale bome. “Die boom van die lewe” onderhou nie net die liggaamlike lewe soos die ander vrugtebome nie, maar gee veral die ewige lewe. (Genesis 3:22). “Die boom van die kennis van goed en kwaad” (AOV) gee volledige kennis en onderskeiding (vgl. Jesaja 7:15-16) van wat goed en wat kwaad was. Die kennis van wat goed en wat kwaad was is nie aan Adam gegee deur van die vrug van hierdie boom te eet nie, maar juis deur nié daarvan te eet nie. God se verbod om hiervan te eet het aan Adam de juiste kennis gegee van goed en kwaad, naamlik: die nalaat om daarvan te eet is “goed” en die eet daarvan is “kwaad”. Dus gehoorsaamheid is

“goed” en ongehoorsaamheid is “kwaad” en strafbaar met die dood! Ook die opdrag om die tuin te bewaak (Genesis 2:15 AOV) teen ’n bose mag het ook vir Adam kennis gegee van goed en kwaad, naamlik: waak oor die tuin is “goed” en om nie te waak oor die tuin nie, is “kwaad”!

God het Adam die taak gegee om die tuin te bewerk en daarvoor wag te hou (Genesis 2:15-17 AOV). Die volmaakte skepping (Genesis 1:31) het ingesluit: sinvolle werk in die tuin en kultuur op die aarde te bring (Genesis 1:28)! Adam moes ook waak oor die tuin (Genesis 2:15) teen ’n bose mag wat in Genesis 3:1 geopenbaar word.

Gevolgtrekking. Beide Genesis hoofstuk 1 en 2 leer dat die plante en bome VÓÓR die man en die vrou geskep is.

2:18-25

Vraag 3. Wat was die chronologiese volgorde van die skepping van diere en die mens?

Aantekeninge. Genesis 2:18-25 gaan voort met die beskrywing van die menslike geskiedenis: God skep die vrou. Genesis 1:20-27 leer duidelik dat die voëls en die diere vir die man en vrou geskep is. Genesis 1:26-27 is ’n samevatting van die skepping van die man en die vrou sonder om iets te sê oor die lang tyd tussen die skepping van die man en die skepping van die vrou. Genesis 2 leer duidelik dat die skepping van die vrou ’n aansienlike tyd NÁ die skepping van die man plaasgevind het!

Genesis 2:18-20 AOV sê, “Ook het die HERE God gesê: Dit is nie goed dat die mens alleen is nie. Ek sal vir hom ’n hulp maak wat by hom pas. En die HERE God het uit die aarde geformeer al die diere van die veld en al die voëls van die hemel en hulle na die mens gebring om te sien hoe hy hulle sou noem. En net soos die mens al die lewende wesens genoem het, so moes hulle naam wees. So het die mens dan name gegee aan al die vee en aan die voëls van die hemel en aan al die wilde diere van die veld, maar vir die mens het hy geen hulp gevind wat by hom pas nie”.

(1) Genesis 2:19. Die mens is geskep ná die skepping van diere.

Sommige mense vertaal Genesis 2:19 asof God die diere en voëls NA die mens geskep het. Maar die Hebreeuse werkwoord in Genesis 2:19 staan in die voltooiende verlede tyd en kan die beste vertaal word met: “God het geskep” i.p.v. “God skep”. Toe die HERE God alle diere van die veld en alle voëls in die lug uit die aarde gevorm het (naamlik VÓÓR die skepping van die mens), bring Hy hulle by Adam (naamlik NA die skepping van die mens) om te sien hoe hy hulle sou noem. Dus, nadat God die voëls (Genesis 1:20-23) en die diere (Genesis 1:24-25) gevorm het, het Hy die mens geskep (Genesis 1:26-27) en bring hulle by die mens en die mens gee hulle toe hulle name (Genesis 2:20).

(2) Genesis 2:18-20. Die mens gee name aan die diere.

Deur name te gee aan die diere het die mens gewys dat hy die aard van elk dier en voël begryp het. Deur baie met die diere om te gaan en hulle waar te neem, het die mens intens bewus geword daarvan dat hy heeltemal anders was as die voëls, visse en diere.

(3) Genesis 2:20. Die mens vind geen helper tussen die diere wat by hom pas nie.

Sommige mense vertaal Genesis 2:20b asof God vir die mens geen hulp kon vind wat by hom pas nie. Hulle lê die vers uit asof die skepping van diere en voëls ’n mislukte poging van God was om ’n helper wat by die mens pas vir die man te skep. Hulle sê dat die man tussen die diere en voëls geloop het en name gegee het, maar God kon nie vir die man ’n helper vind wat by hom pas tussen die diere en voëls nie. Hierdie uitleg is nie moontlik nie, omdat die God wat die man geskep het (Genesis 2:7) ook in staat was om ewe maklik die vrou te skep (Genesis 2:21-22)!

Die uitdrukking, “maar vir die mens het hy geen hulp gevind wat by hom pas nie” (Genesis 2:20) is die Hebreeuse manier om te sê, “Adam het geen helper vir homself gevind nie”. Dit was nie God nie, maar die man wat geen helper wat by hom pas, kon vind nie! Genesis 2:20b kan beter vertaal word met: “maar hy (d.w.s. die man en nie God nie) het geen helper gevind wat by hom pas nie”. Dit beteken dat voor God die vrou geskep het, het Hy eers ’n verlange in die man Adam wakker gemaak na omgang met ’n vrou wat by hom pas. Tóg na vele rondbeweeg tussen die diere, kon die diere die verlange van Adam nie vul nie. Alleen ’n menslike wese wat aan Adam gelyk was, sou die verlange kon vul. Daarom skep God in Genesis 2:21-22 ’n vrou, Eva, uit die sy van die man waarmee God die diepe misterie van “twee word één mens” in Genesis 2:23-24 uitdruk. Die vrou word nie uit sy voet geneem om sy slaaf te wees nie en ook nie uit sy kop geneem om oor hom te heers nie! Sy word uit sy sy geneem om sy gelyke, en die helper aan sy sy te wees.

(4) Genesis 2:18. Die inleidende opmerking.

Net soos God ’n inleidende opmerking in Genesis 1:26 maak vóór Hy die man en die vrou in Genesis 1:27 skep, so maak God ’n inleidende opmerking in Genesis 2:18 voor Hy die vrou in Genesis 2:19-22 skep.

Gevolgtrekking. Beide Genesis 1 en Genesis 2 leer dat die diere geskep is VÓÓR die skepping van die mens.

1:26-29; 2:7

Vraag 4. Wat maak die mens anders as die ander dinge wat God geskep het?

Aantekeninge. Mense is heeltemal anders as die ander dinge wat God geskep het.

(1) Die menslike liggaam.

Genesis 2:7 sê dat God die mens uit die elemente van die aarde gevorm het en toe die lewe in sy neus geblaas het. Terwyl God die diere deur sy skeppende woord gevorm het, het Hy die man gevorm met sy eie hande en met sy eie lewensasem. Dit toon dat die menslike liggaam en die menslike gees heel uniek is en 'n heel besondere bestemming het.

(2) Die menslike gees.

Genesis 1:26-27 sê dat God die mens na sy eie beeld geskep het. Dit beteken nie dat God die mens met 'n goddelike natuur geskep het nie. Die mens het 'n geestelike natuur ontvang wat ooreenstem met die geestelike natuur van God. Die mens besit soortgelyke kenmerke as dié van God. Die mens was in 'n bepaalde opsig "'n kopie" van God se persoonlikheid. In dié opsig is mense volkome uniek in die hele skepping! Niks, behalwe die man en die vrou, in die skepping is beeldraers van God nie!

(3) Die mens se verhouding met God.

Genesis 2:15-17 sê dat God direk met die man gepraat het. Dit was waarskynlik die eerste keer dat God direk tot die mens gespreek het. In Genesis 1:28-29 het God ook direk met die man en die vrou gepraat. Genesis 1-3 is die eerste openbarings van God aan mense! Dit beteken dat mense instaat is om na God te luister en instaat is om met God te praat. God het die mens gesien en hom drie belangrike opdragte gegee:

- Vermenigvuldig en vul die aarde met mense na God se beeld
- Onderwerp die aarde
- Heers oor die tuin met die bome en heers oor die voëls, visse en diere.

Dit maak baie duidelik dat God die aarde geskep het "vir die mens" en dat Hy die mens die bestuurders van sy skepping gemaak het!

Samevatting. Mense het 'n liggaamlike en 'n geestelike natuur en bestaan, d.w.s. hulle het 'n liggaam en 'n gees. Die liggaam en die gees vorm saam "die siel", die lewende wese wat "mens" heet (Genesis 2:7). Hierin is die mens anders as ander skepsels. Alleen die mens:

- kan rasioneel dink/dinge uitredeneer
- het 'n gewete wat kan onderskei tussen goed en kwaad
- het intuïsie wat kan weet sonder om te rasionaliseer
- het die vermoë om dinge te ontwerp en te skep (d.w.s. te vorm of te maak uit bestaande materie)
- het die vermoë om God te ken en met God om te gaan.

2:24

Vraag 5. Is die huwelik net 'n menslike instelling of 'n goddelike instelling?

Aantekeninge. Die huwelik is 'n kulturele instelling van God.

(1) Die huwelik is God se idee en instelling.

In Genesis 1 en 2 het God die behoefte van die man na 'n vrou as lewensmaat wakker gemaak en toe 'n vrou vir die man geskep. God het ook die inisiatief geneem in die instelling van die huweliksverhouding. REEDS VÓÓR die sondeval het God die huwelik ingestel met die volgende vereistes:

- Die man en die vrou moet hulle ouers verlaat
- Die huweliksverhouding is 'n verhouding tussen één man en één vrou, waarin die man hom aan sy vrou (enkelvoud) moet heg (vasmaak) op so 'n wyse dat hulle nooit meer van mekaar losgeskeur kan word nie (Matteus 19:5-6; Efesiërs 5:31-33).
- Die seksuele verhouding bly beperk tot daardie één man en één vrou, en eers NA hulle huweliksbevestiging/-seremonie en is alleen binne hulle huweliksverhouding toelaatbaar (Hebreërs 13:4).

(2) God het die huwelik as instelling gehandhaaf ná die mens se sondeval.

Beide die Here Jesus Christus (in Matteus 19:1-6) en die apostel Paulus (in Efesiërs 5:22-33) herhaal God se instelling van die huwelik as 'n instelling wat op die hele aarde en in die hele menslike geskiedenis moet voortbestaan.

1:28a

Vraag 6. Moet mense op aarde onbeperk voortgaan met vermenigvuldiging?

Aantekeninge. Die eerste taak van die mens is om die aantal mense op die aarde te vermenigvuldig.

(1) Voor die sondeval.

Let wel daarop dat die bevel in Genesis 1:28 gegee word NÁ Genesis 1:26-27, waar God mense maak "na ons beeld, na ons gelykenis" (AOV) (ANV "ons verteenwoordiger, ons beeld"), en dit VÓÓR Genesis 3, toe die mens in sonde geval het. Daarom moet vers 28 in die verband waarin hy staan uitgelê word. God se aanvanklike doel was om die hele aarde te vul, nie sommer met alle soorte mense nie, maar met mense wat sy beeldraers is! God het die aarde ontwerp om vol

mense te wees wat Hom ken, liefhet, gehoorsaam en verheerlik! God het beplan dat die aarde vol mense sou word wat soos God was in ware regtigheid en heiligheid (Efesiërs 4:24) (ANV “lewe volkome volgens die wil van God en wees heilig”).

(2) Na die sondeval.

Maar na die sondeval lees ons in Genesis 5:1-2 dat Adam ’n seun gehad het “na sy gelykenis, na sy ewebeeld” NLV stel dit so: “(Set) was die ewebeeld van sy pa (Adam)”. Van die sondeval af, word die aarde steeds voller gemaak met mense wat geen beeldraers van God was in die sin wat dit gehad het VÓÓR die sondeval nie. Nietemin word God se oorspronklike doel nie verander nie. God wil nog stééds die aarde vul (Genesis 9:1) en wel met mense wat beeldraers van Hom is.

Deur die verlossingswerk wat Jesus Christus voltooi het, word mense “ ’n nuwe skepping” (2 Korintiërs 5:17; Efesiërs 4:20-24). Daarom, wanneer Christene vrae bespreek rakende die oorbevolking van die aarde, geboorte beperking en die aantal kinders per gesin, dan moet God se aanvanklike doel in gedagte gehou word, naamlik dat God die aarde wil vul met mense wat sy beeldraers is. Oor die algemeen gee God vir ’n man en vrou in die huwelik die keuse, die moontlikheid en die verantwoordelikheid om te reproduseer. Maar God gee aan alle manne en vroue op die aarde die verantwoordelikheid om die aarde te vul met mense wat beeldraers van die God van die Bybel is, in ware geregtigheid en heiligheid (NAV “lewe volkome volgens die wil van God en wees heilig”).

1:28b

Vraag 7. Hoe moet mense die aarde onderwerp?

Aantekeninge. Die tweede taak van die mens is om die aarde namens God te onderwerp en te beheer.

(1) Die woord “onderwerp” beteken: om te onderwerp, neer te druk, te tem, gelyk te maak en dus te oorwin.

Die taak van die man en die vrou is dus om kultuur en ontwikkeling te bring in die gebiede van die aarde waar dit nog nie is nie. Hulle moet die onbewoonbare plekke bewoonbaar maak, die grond wat nog nie bewerk is nie omploeg en wilde diere tem vir huishoudelike gebruik. Mense moet deur die beoefening van verantwoordelike wetenskap die natuurwette in God se skepping ontdek en die wette in die fisika, chemie, geologie, ens. gebruik tot die beswil van die mens. Tóg is die reg om wetenskap, landbou en industrië te beoefen nie sonder grense nie!

(2) Die woord “onderwerp” beteken ook bewaar, genees.

Die taak van die man en vrou is om God se skepping te bewaar van misbruik en vernietiging. Die gebruik van die grondstowwe het beperkings wat deur God opgelê is. Mense mag nie grondstowwe misbruik tot hulle eie voordeel en verryking ten koste van die armes in hulle land nie. Mense mag nie God se skepping vernietig deur lug-, water- en grondbesoedeling wat die delikate balans in die skepping versteur en lei tot vernietiging van plante, insekte, voëls, diere en mense. Mense mag ook nie die grondstowwe (bv. water) verkwis deur wanbestuur wat lei tot hongersnood en armoede nie. In Openbaring 11:18 waarsku God die nasies, die regerings en die militêre magte op aarde teen vernietiging van die aarde, want daar kom ’n tyd dat God hulle gaan vernietig!

(3) Die woord “onderwerp” sluit ook in om die kultuur van die Koninkryk aan alle volke op die aarde te bring.

Die kultuur van enige volk op aarde bestaan uit hulle wêreldbeskouing, waarhede, geloofsoortuigings, bygelowe, norme en waardes wat uitgedruk word in gewoontes, tradisies, gedrag, verhoudings en instellings. Na die sondeval het die kulture van die verskillende volke steeds verder weg beweeg van die Lewende God en die kultuur van die Koninkryk van God. Deur die jare heen het mense sonder God geleef en is steeds meer sondige aspekte tot hulle kultuur bygevoeg. God se doel is nie net om mense te verander nie, maar ook om die kultuur van mense te verander! God is van plan om één spesiale volk van God met één spesiale kultuur, naamlik, die kultuur van die Koninkryk van God, op hierdie aarde tot stand te bring! Omdat menslike gedrag die saak is waaroor dit in die Bybel gaan, is die meeste onderrig, bevel en gebooie in die Bybel gerig op die verandering van mense en hulle kultuur!

1:28c

Vraag 8. Hoe moet mense op die aarde heers?

Aantekeninge.

(1) Die woord “heers” beteken heerskappy voer oor, onderwerp.

Die taak van die man en die vrou is om die skepsels van God in die lug, in die water en op land te beheer. Ons lees bv. in Spreuken 12:10: “Die regverdige sorg goed vir sy diere, maar die goddeloses is wreed.” ’n Christen mag nie wreed wees teenoor diere nie, maar moet die diere wat aan hom toevertrou is goed versorg. So moet die Christen ook goed sorg vir God se hele skepping.

(2) Die mens mag voëls, visse en diere tot voordeel van mense te gebruik.

Mense moet oor voëls, visse en diere heers deur verstandige besluite tot voordeel van mense te neem. Vóór die sondeval kon die mense alleen saaddraende plante en vrugte eet. Maar ná die sondeval en die vloed kon mense ook die vleis van

voëls, visse en diere eet. “Alles wat roer en lewe, sal kos wees vir julle. Naas die groen plante gee Ek dit alles vir julle.” (Genesis 9:3).

(3) Die mens mag nie oor ander mense heers nie.

Die taak om te heers word beperk tot voëls, visse en diere. Die mens mag nie willekeurig heers oor ander mense nie. Mense mag nie ander mense verdruk, vervolg, tot slawe maak of doodmaak nie. 'n Volk het nie die reg om oor 'n ander volk te heers nie. 'n Persoon uit 'n volk het ook nie die reg om homself oor sy volk aan te stel as heerser nie, en dit sluit sy eie mense in asook die vreemdelinge wat onder hulle woon. 'n Regering mag sy ondergeskiktes nie onderdruk, vervolg, uitbuit, tot slawe maak of op enige ander wyse vernietig nie! God het “al die nasies gemaak. Hy het hulle gemaak om oor die hele aarde te woon. Hy het bepaal hoe lank hulle sal bestaan en waar hulle sal woon. God het hulle gemaak om Hom te soek, al sou hulle ook moes rondtas om Hom te vind” (Handelinge 17:26-27). God se doel met die volkeregeskiedenis is dus dat mense uit elke volk Hom sou soek en vind! Maar die aarde met al die grondstowwe bly die besitting van die God van die Bybel (Psalm 24:1) en geen enkele volk het die reg om 'n stukkie van die aarde as hulle besitting op te eis nie. Mense behoort alleen die rentmeesters van God se besittings te wees!

(4) Christene mag betrokke raak in regeringssake.

In die Ou Testament was daar, behalwe die konings van Juda soos Dawid, Asa, Josafat, Joas, en andere, ook mense soos Moses, Josef, Daniël, en Nehemia wat hoë regeringsamptenare was in lande soos Egipte, Babilon en Persië. Hulle het baie goeie invloed op almal gehad! In die Nuwe Testament was Nikodemus 'n lid van die Sanhedrin, die regering van die Jode. In Lukas 7 en Handelinge 10 word hoë Romeinse militêre offisiere Christene. In Handelinge 8 word 'n hooggeplaaste amptenaar uit Ethiopië 'n Christen. In Handelinge 13 word die goewerneur van Ciprus 'n Christen. En in Handelinge 17 word 'n lid van die raad van Athene ook 'n Christen.

Jesus Christus het gekom om mense uit elke laag van die bevolking te red; ook mense wat hoë ampsdraers was. Sulke mense kan vanuit hulle hoë posisies goeie invloed uitoefen. In 1 Timoteus 2:1-4 word Christene aangespoor om vir alle mense te bid en veral vir konings en gesagsdraers, sodat Christene 'n rustige en stil lewe kan hê sodat alle mense gered kan word en die waarheid leer ken. Jesus het gesê dat die apostels ook teenoor die heersers van lande sou getuig (Matteus 10:17-20; Handelinge 23:11; 1 Petrus 2:15).

(5) Die taak om te heers word tot hierdie aarde beperk.

Mense behoort nie kosbare geld en bronne te verkwis deur die buitenste ruimte te ontdek nie, terwyl daar nog soveel mense op aarde is wat in armoede en hongersnood lewe!

STAP 4. DOEN.

TOEPASSINGS

Oorweeg. WATTER WAARHEDE IN HIERDIE BYBELGEDEELTE HET MOONTLIKE TOEPASSINGS VIR CHRISTENE?

Deel dit en skryf dit neer. Kom ons hou 'n dinkskrum en maak 'n kort lysie van moontlike toepassings uit Genesis 1:24 – 2:25.

Oorweeg. WATTER MOONTLIKE TOEPASSING WIL GOD HÊ DAT JY PERSOONLIJK MOET MAAK?

Skryf neer. As jy 'n persoonlike toepassing maak, skryf dit dan neer in jou Bybelstudienotaboek. Het jy die vrymoedigheid om hierdie persoonlike toepassing met andere te deel of nie?

(Let wel: Alhoewel 'n waarheid dieselfde bly, is daar 'n hele aantal verskillende toepassings van hierdie waarheid moontlik. Hier volg 'n lys van moontlike toepassings)

1. Voorbeelde van moontlike toepassings uit Genesis 1:24 – 2:25.

- 1:27. Bly die hele tyd bewus daarvan dat jy 'n beeldraer van God in die wêreld is.
- 1:28. Raak aktief betrokke in die taak om die aarde te vul met mense na die beeld van God. Help jou eie kinders en die kinders van andere om Jesus Christus te ken en na sy beeld te verander.
- 1:28. Ontdek God se wette in die natuur, beoefen verantwoordelike wetenskap en gebruik die ontdekkings tot die beste voordeel van die mens.
- 1:28. Beskerm en bewaar God se skepping teen misbruik en vernietiging.
- 1:28. Bring Bybelse Kultuur na alle ander menslike kulture.
- 1:28. Maak wyse en opbouende besluite m.b.t. tot die voëls, visse en diere as voedselbronne vir die welsyn van die mens.
- 1:28. As 'n Christen in 'n gesagsposisie is, moet hy soveel moontlik goeie invloed op sy gemeenskap uitoefen.

2. Voorbeelde van persoonlike toepassings uit Genesis 1:24 – 2:25.

Nou begryp ek die kulturele taak van Christene beter. Christene behoort die volgende sake ernstig te oorweeg:

- Stop die vernietiging van die natuur en die ekologiese balans, bv. stop die vernietiging van die osoonlaag rondom die aarde, die vernietiging van die reënwoude, die oorbeweiding van lande en die uitwissing van bepaalde diere in die voedselketting.
- Stop die vervuiling van die aarde; bv., stop die vervuiling van water deur chemikalië en gifstowwe van die industrie in riviere te laat beland. Stop lugvervuiling deur ongekontroleerde industrie en vervoer. Stop klankbesoedeling.

- Stop die skadelike toepassings van die landbouwetenskap; bv., stop die inspuiting van groeihormone in diere wat die mens later eet, die toevoeging van skadelike preserveermiddels en kleurstowwe asook die genetiese manipulasie van voedselsoorte wat die mense later moet eet.
- Stop die skadelike toepassings van die industriële wetenskap; bv., stop die produksie van wapens, van kernwapens en van produkte wat bestem is vir bakteriologiese en chemiese oorlogvoering.
- Stop die skadelike toepassings van die mediese wetenskap, bv., aborsie van ongewenste kinders, genadedood en genetiese manipulasie van die menslike liggaam.

Die wêreldwye Gemeente of Kerk het die kulturele taak van God gekry. Dis ook van toepassing op die intellektuele, emosionele, sosiale en geestelike terreine van die lewe.

- Anders gestel:

Christene behoort betrokke te raak by die bestryding van leuens, pornografie en geweld, wat deur die massamedia (tydskrifte, TV, vermaaklikheidsbedryf) gepropageer word. Hulle behoort die wettiging van aborsie, homoseksuele huwelikssluitings in die kerk, en verdraagsaamheid van rassediskriminasie en korrupsie teen te staan. Hulle behoort casino's, dobbelhuise, loterye en ander kansspeletjies wat mense verslaaf teen te staan. Hulle behoort die produksie, verspreiding en gebruik van verslawingsmiddels teen te gaan, ens.

- Positief.

Christene behoort betrokke te raak in die bekamping/onderwerping van goddeloosheid en ongeregtigheid deur die Christelike Geloof te versprei. Hulle behoort betrokke te raak deur 'n einde te maak aan geestelike onvolwassenheid en vrugtelooheid onder Christene deur dissipels te maak. Hulle behoort betrokke te raak in die uitroeiing van sosiale euwels en goddelose waardes. Hulle behoort betrokke te raaken by die opbou van goeie instellings soos klinieke, hospitale, skole, gesonde sport- en ontspanningsfasiliteite en versorging van bejaardes wat 'n positiewe christelike invloed i.p.v. 'n antichristelike invloed uitoefen. Hulle behoort pastorale hulp te verleen aan mense sodat hulle gesond kan word van hulle gebrokenheid. Die kulturele taak van die Gemeente of Kerk het te make met die hele mens, met alle delen van God se skepping en met elke aspek van die menslike kultuur!

STAP 5. BID.

REAKSIE

MAAK BEURTE EN BID TOT GOD OOR ÉÉN WAARHEID WAARMEE GOD JOU AANGESPREEK HET in Genesis 1:24 – 2:25.

(Reageer in jou gebed op iets wat jy gedurende die Bybelstudie geleer het. Oefen jouself om kort te bid, bv. deur net één of twee sinne te bid. Onthou dat elkeen in die groep oor verskillende dinge kan bid)

5	GEBED (8 minute)	[VOORBIDDING] BID VIR ANDERE
---	------------------	---------------------------------

Gaan voort met bid in groepies van twee of drie mense (as daar tyd is). Bid vir mekaar en vir die mense in die wêreld (Romeine 15:30; Kolossense 4:12).

6	VOORBEREIDING (2 minute)	[OPDRAGTE] VIR DIE VOLGENDE BYEENKOMS
---	--------------------------	------------------------------------------

Deel die voorbereiding vir die volgende keer uit.

1. **Toewyding.** Wy jou daaraan om 'n dissipel te wees en dissipels te maak. Verkondig, leer en bestudeer die Bybelstudie van Genesis 1:24 – 2:25 saam met iemand anders of met 'n klein groepie mense.
2. **Persoonlike tyd met God.** Hou stiltetyd met God uit ongeveer 'n halwe hoofstuk per keer uit Genesis 12:1 – 15:21. Maak gebruik van jou uitgekose Bybelvers of gunstelingwaarheid metode.
3. **Memoriserings.** Oordink en leer uit jou kop. (1) Die aard van sonde. Romeine 3:23. Herhaal elke dag die laaste vyf Bybelverse wat jy uit die kop geleer het.
4. **Gebed.** Bid vir iemand of iets spesifiek hierdie week en sien uit na wat God doen (Psalm 5:4).
5. **Hou jou nota op datum.** Hierdie keer oor stiltetyd, memoriserings, Bybelstudie en hierdie opdrag.